

Kinguaassiutitigut atorerlunneqarsimasunut katsorsaavissamik pilersitsinissamut naalakkersuisut suliaqaqqullugit Inatsisartut aaliangiiffigisassaattut siunnersuut.

(Inatsisartuni ilaasortaq Aleqa Hammond, Siumut)

Kinguaassiutitigut atorerlunneqarsimasunut katsorsaavimmik pilersitsinissaq siunertaralugu naalakkersuisut Inatsisartunit peqquneqarnissaannik aalajangiiffigisassaattut siunnersuut.

(Inatsisartunut ilaasortaq Juliane Henningsen, Inuit Ataqatigiit)

Akissuteqaat

(Isumaginninnermut Naalakkersuisoq Maliina Abelsen)

Siullermeerneqarnera.

Matumani Aleqa Hammond-imit, Siumut aamma Julianne Henningsen-imit, Inuit Ataqatigiit aalajangiiffigisassatut siunnersuutit marluk Naalakkersuisut assut pitsaasutut isigaat. Aalajangersimasunik nutaanik suliniuteqarnissaq naalakkersuinikkut tamatigoortumik isumaqatigiisutigineqarpoq: Ilisimasat pisariaqartitat pigaavut, alloriarnissarlu tulliuuttoq tassaassaaq iliuusisatut piviusumik pilersaarusiornissaq. Iliuuseqarfissaq Naalakkersuisut tullerriaarinermi qaffasisumik inissippaat, taamaattumillu siunnersuuteqartutulli isumaqarlutik, maannakkut iliuuseqartartariaqartoq.

Ullumikkut ilisimavarput, kinguaassiutitigut innarlerneqarneq meeqqap ineriartoqqinnissaanik annertoorujussuarmik aseruisuusoq. Aamma ilisimavarput, inersimasutut inuunermik ingerlatsilernermi isumaginninnerup iluani ajornartorsiutit alianartut suut pinerliinerup kinguneralugillu sunniutigisarnerai..

Taamaattumik Naalakkersuisut aalajangersimapput katsorsaavimmik pilersitsisoqassasoq, siullermik meeqqat kinguaassiutitigut atorerlunneqarsimasut eqqarsaatigalugit. Taakkua saniatigut katsorsaavik atorneqassaaq siunnersuinernut assigiinngitsunut aamma ataqatigiissaariner-nut assigiinngitsunut. Taamaattumik pingaaruteqarpoq suliamik ilisimasallit aamma sulisut katsorsaaneramik neqeroorutip sapinngisamik pitsaanerpaamik qanoq iluseqarnissaanik aamma Kalaallit Nunaannut tamarmut siammarneqarnissaanik suliaqarnermi peqataatinneqarnissaat. Pingaaruteqarpoq pilersitassap atulersinneqarnissaani ataqatigiissaarineq kommunit suleqatigalugit ingerlanneqarnissaa.

Kinguaassiutitigut pinerlineqarsimsunut ikiuniarnermi assigiinngitsunik aallaavilinnik ikiorteqarnissaq pisariaqartinneqarpoq. Ullumikkut inunnut kinguaassiutitigut atorerlunneqarsimasunut assigiinngitsunik ikiueriaaseqarpugut. Ikiuineq inunnut ataasiakkaanut ikiuineruvoq, kil-lilimmik gruppiniq katsorsaanerulluni, kisiannili qitiusumik taakkunanga ataqatigiissaarineq amigaataavoq.

Taamaattumik qulakkiissavarput, neqeroorutit ataqatigiissinnissaat, aammalu eqqungaasimasut pisariaqartitaannik siunnerfeqassallutik. Tamanna oqartussaasoqarfiit Naalakkersuisut, kommunit inuiaqatigiillu tungaannit iliuuseqatigiinnissaannik pisariaqartitsivoq

Naalakkersuisut oqaatigisinnaavaat Isumaginninnermut Naalakkersuisoqarfiup meeqqat inuusut-tullu iluanni ilaatigut kinguaassiutitigut atorerluineq pillugu paasissutissiisumik atuagaaqqiami “hvidbog” inassuteqaatit misissorlugit ingerlammagit.

Aamma qanittukut Kalaallit Nunaanni meeqqanut sullissivik pillugu konferenceqartoqarpoq peqatigiiffiit Meeqqat Inuunerissut/Bedre Børneliv, ICYC, NANU aamma Red Barn-ip aqqis-suussaannik, aammalu PAARISA-p suliarisimallugu annersaasarneq aamma kinguaassiutitigut atorerluisarneq pillugit isumassarsiorfissaq annertooq. Siunertaavoq suliniutit taakkua angisuut pingasut piviusumik nutaanik suliniuteqarnissanut tunngaviliisasut: Siullermik meeqaanik katsor-saavik.

Katsorsaaviliornissamik suleriarnissamut pilersaarut Naalakkersuisut suliarissavaat, ilanngullugit aningaasatigut nassatarisassaanik naatsorsuusiorneq.

Isumaginninnermut Naalakkersuisoqarfik taamaattumik pilersitsinissamut aningaasanik immik-koortitsererpoq. Aningaasaliissutit tiguneqassapput 25 mio. kr.-niit, AI-mi 2010-mut meeqqat aamma inuusuttut iluanni ataqtigiissumik ataqtigiissaakkamillu suleriuseqarnissap aallartinne-qarnissaanut aamma piviusumik suliniuteqarfissanik pingaarnersiuinernut atugassiissutinit, tama-tumani ilanngunneqarluni meeqqanut kinguaassiutitigut atorerlunneqarsimasunut katsorsaaneq.

Taamaattumik siuliiniittut tunngavigalugit Naalakkersuisut inassutigaat, siunnersuutit taama isik-koqartillugit akuersissutigineqassasut.